

MR DAVID KOCK:

OM A KERE CU LO HAYA CANTIDAD DI CUENTA BANCARIO YEN DEN EXTERIOR PERO A HAYA E FORTUNA DI SEVINGER NA CERO




2
**SONDEANDO
POSIBILIDAD
PA AVIACION Y
TRANSPORTE
MARITIMO**

4
**ANALISIS
CASO AVESTRUZ
LO BIRA PROCESO
PA MINISTERIO
PUBLICO
SCAPA CARA**

13
**'XAN BOGAERTS TO XAN DIEGO'
POPULARIDAD DI
XANDER BOGAERTS
NA SAN DIEGO
CRECIENDO**

SEMI-FINALS | **13 DECEMBER
3PM**
**ARGENTINA
VS
CROACIA**
  




The #1 Payroll & HRM Software in the Caribbean



- Easy to Use & Always Accurate
- Complete Integration of HRM & Payroll
- 24/7 Support from Local Specialists
- On-premise or Cloud
- All Types & All Sizes of Companies incl. Government

Tel. 583-7072 | info@vcc-int.com | www.vcc-int.com



SONDEANDO POSIBILIDAD PA AVIACION Y TRANSPORTE MARITIMO

Gobierno a habri siman cu bishita di Minister Harbers di e Ministerie van Infrastructuur en Waterstaat di Hulanda unda a reuni riba e tema di luchtvaart y scheepvaart pa posibel colaboracion.

Tambe a toca e tema di infrastructura hunto cu Prome Minister Evelyn Wever-Croes pa formalisa e cooperacion den Reino y asina concretisa palabracionnan riba con Hulanda por provee nan experticio y conocimiento riba industrianan menciona cual ta scheepvaart y luchtvaart.



Esaki lo yuda Aruba fortifica su posicion den e industria aki unda cu ya

caba a yega di menciona cu tin hopi oportunidad economico, pero cu na

mes momento mester tene cuenta cu nos medio ambiente.



TRAPI TURISTICO NA RODGER'S BEACH A KEDA CLA

Ayera a entrega e proyecto di renobacion di e trapi di Rodger's Beach, caminda a haci uzo di artistanan di mosaic local y internacional den cooperacion cu Parke Marino.

E mosaic ta representa Aruba su flora, fauna y cultura, dunando un bista bunita colorido.

Un proyecto mas cu ta hisa e calidad di producto Aruba y ta trece mas bida den area di Seroe Colorado.

Un bunita atraccion turistico.

MR DAVID KOCK:

OM A KERE CU LO HAYA CANTIDAD DI CUENTA BANCARIO YEN DEN EXTERIOR PERO A HAYA E FORTUNA DI SEVINGER NA CERO

E siman aki Corte di Husticia a cuminsa cu e sesion unda abogado di e acusadonan den e caso Avestruz ta haya chens pa presenta nan defensa. Dialuna a toca turno na Benny Sevinger y Pieter S. Kende ta un amigo di hopi tempo di e ex mandatario.

E sesion ta sigui awe mainta cu e defensa di Leoncita A., y Mary W. y atardi tin defensanan di Rebecca R. y Frederick E. Diaranson ta toca turno na defensa di Ninosca N., Gaby W., y Carlo M. y atardi Fiscal ta reacciona riba e pleidooonan di dialuna, y probablemente esnan di diamars tambe. Diahuebs tin e defensa di Curt H., Ewald B. y Franklin A.

Mr. David Kock a hiba un defensa unda a pone hopi enfasis riba e aspecto huridico di e acusacionnan presenta contra su cliente. El a pidi Hues na final di tur su argumentonan pa declara su cliente liber pa motibo cu no a comete algo ilegal.

El a menciona e companianan cu a haya tereno, pero esaki a sigui procedura normal. Nan no ta amigo di dje y no ta manera OM a bisa cu amiga di e politico tabata doño di e companianan na momento cu a haci e peticionnan.

A papia di e hecho cu un testigo a bisa cu Sevinger a haya placa for di e otro acusado Leoncita A. Pero esaki segun e abogado no a keda proba. Ta papia di un envelop y e testigo mes no sa kico e contenido ta realmente. E ta bisa cu ta placa, mientras cu e casa di Sevinger a bisa cu e testigo ey a bin busca un envelop cu ticket di Lotto di Florida pa Leoncita. E ultimo aki a declara cu diferente hende sa trece ticket pe ora cu e mes no ta aya pa manda nan.

El a produci un carta di un testigo di OM kende a bisa cu e no a wordo privilegia. E carta ta mostra cu Sevinger a firma su peticion p'e cu e palabra "di e banda aki no tin obheccion, duna cooperacion". Sinembargo e testigo aki a haci peticion pa un tereno cu a wordo pidi caba. Sevinger no tabata sa esaki mes.

A menciona tambe cu no ta e acusadonan so a wordo "privilegia" cu un tereno comercial. Segun e acusado a yega di bisa, el a firma mas cu 300 peticion comercial cu a wordo treci cerca dje. Pero esakinan OM no a menciona den su rekisitorio.

Si Sevinger kier beneficia un conoci di dje, e lo tabata sa cu el a firma pa e tereno ey caba.



El a recorda corte cu Sevinger y Sussebeek ta bon amigo cu otro y prome cu Sevinger a bira minister, ya caba su amigo tabatin tereno y proyecto desaroya. E no a bira rico bou manehod i Sevinger y si OM a haci un debido investigacion nan lo tabata sa esey.

Debi na e amistadnan mes cu nan tin, Sevinger por a pidi Sussebeek haci favor p'e debi cu e tabata demasiado druk. Tur favor cu el a hacie, el a paga cash bek ora cu el a haya e recibonan. Y tambe ta berdad cu el a manda busca material na Merca via compania di Sussebeek.

"Ta hopi hende na Aruba ta haci compra na Merca. E unico cos ta cu Sevinger no tabatin un adres na Merca pa banda e materialnan y despues manda nan Aruba. Sussebeek su compania si tabatin."

"OM tabata convenci cu lo haya cuentanan bancario den exterior cu miyones di dollar, cu lo haya placa scondi den buraco riba su tereno pa cual a bay cu cachonan special pa busca. Tambe a pensa cu e tin condominium riba su nomber, potchinan WC y cranchinan di oro na su cas. Cero di oro Sevinger lo tin, segun e politico cu a pone e caso aki lora.

Y pa esaki mester castiga Sevinger basta pisa. Pero nada no ta berdad. Dilanti Corte aki ta para un homber simpel kende cu su mesun mannan y den su oranan liber a traha riba su cas. Apesar di e mas cu 2 miyon florin cu el a gana como Parlamentario y Minister O cu ta su unico fuentenan di entrada, cu el a gana den transcurso di tempo, su fortuna ta practicamente cero.

Su entrada a bay pa cria su famia, estudio di su yiunan y gastonan di su campaña politico. Un imagen totalmente diferente di un ex mandatario cumpra."

Analisis

Caso Avestruz lo bira proceso pa Ministerio Publico scapa cara

“Wettig en overtuigend bewijs” ta e base di tur caso penal, den tur disputa cu Corte tin cu atende y tuma un decision y ayera mainta por a bolbe confirma, cu caso Avestruz lo bira un caso caminda e meta principal di Corte Hudicial, ta con lo salba reputacion di un Ministerio Publico, cu no a respeta e reglanan basico.

Na Papiamento esaki ta nifica cu pa condena un hende, ta rekeri pa Ministerio Publico presenta pruebanan “concreto y legal” y ayera riba e prome dia caminda abogadonan defensor a haya oportunidad pa reacciona riba acusacionnan presenta algun siman atras pa Fiscalnan.

For di e tempo ey caba y hasta prome cu e caso aki a yega den Corte di Prome Instancia, tabata existi duda grandi den kico ta e meta di Ministerio Publico den henter e asunto aki, caminda e rol “politico” di e institucion hudicial aki, ta bira mas y mas evidente.

Ayeru mainta abogadonan defensor di Benny Sevinger, esta David Kock y Demis Illes a enfatisa concretamente cu desde cu Ministerio Publico a tene su rekisitorio algun siman atras, e ekipo defensivo a asumi e tarea pa den e sesion di ayera, trece tur cos bek den perspectiva di kico realmente esakinan ta trata.

Un observacion cardinal cu mr Kock a trece dilanti ta e hecho cu conclusionnan presenta pa Ministerio Publico, a ser haci den un forma erroneo cu nan como abogadonan kier a trece concretamente kico esakinan realmente ta e caso.

Ayeru durante presentacion di e abogadonan di Parlamentario Benny Sevinger, en berdad a duna un otro bista riba e forma con Ministerio Publico kier a hinca cueste loke cueste, un caso den otro, caminda un biaha mas ta bisto cu henter e proceso aki, ta uno caminda Ministerio Publico kier scapa cara y a mete henter e sistema hudicial aden.

Abogadonan tambe a cuestiona e forma di procede di Ministerio Publico den henter e proceso di investigacion loke AWE Mainta tambe a cuestiona caba den pasado, sigur pa e forma con a encarcela y prolonga detencion di Parlamentario Benny Sevinger, mustrandu bon cla cu Ministerio Publico



kier crea un tipo di momentum den henter e proceso aki contra di e politico.

Ayeru mainta e abogadonan tabata hopi “duidelijk” hasta dunando un splicacion con maneho di Minister Sevinger tabata ser hiba pa e dos periodonan cu el a sinta como Minister di Infraestructura.

Na final di dia un biaha mas no por evita di conclui mescos cu a sosode durante di e presentacion di Ministerio Publico dos luna pasa, cu practicamente no tin un base concreto pa e caso aki sigui su curso, cu no tin suficiente prueba legal cu por hustifica e caso aki continua.

Sinembargo di otro banda ya caba a gasta miyones na e proceso aki, Ministerio Publico a hinca su mes y henter e sistema hudicial den un situacion hopi delicado, cu no por otro cu sigui cu e proceso aki, caminda probablemente lo tuma un decision y lo mira unda e barco aki ta bay pega ya cu e sistema hudicial no por permiti su mes e luho cu Ministerio Publico y otro departamentonan hudicial, lo perde cara den e proceso aki.



Minister Geoffrey Wever ta anuncia start di Agri Business Academy

Minister di Asuntonan Economico, Comunicacion y Desaroyo Sostenibel, mr. Geoffrey Wever hunto cu Minister di Transporte, Integridad, Naturalesa y Asuntonan di Adulto Mayor Ursell Arends y Qredits Aruba ta anuncia start di e Agri Business Academy. Meta di e Agri Business Academy ta pa yuda (futuro) empresarionan yega na nan meta door di ofrece nan e tools necesario pa cuminsa of sigui opera un negoshi exitosamente den e sector di Agricultura.

Hunto cu Qredits Aruba lo ofrece un programa personalisa pa e sector di Agricultura, cu un duracion di 12-14 siman, cu ta brinda e materialnan esencial pa crea bo propio Plan di Negoshi y Plan Financiero.

Pandemia a demostra cu nos propio empresarionan den e sector di agricultura por produci productonan di calidad pa mercado local, na mesun momento e sector aki tin retonan, entre otro e habilidad pa maneha un negoshi di agricultura y pa e motibo aki gobierno a partner up pa ofrece e Agri Business Academy na e sector aki.



Di e forma aki gobierno ta traha activamente cu sector priva pa diversifica nos economia, creando asina cuponan di trabao nobo, entrada pa gobierno y haci Aruba menos dependiente di influencia internacional segun Minister Wever.

Minister Geoffrey Wever ta invita cada un cu ta desea di participa pa registra via e QR- code riba e flyer.

DAO ta informa RECES Ontslagcommissie

Director di Departamento di Labor y Investigacion ta ricibi conseho di Comision di Retiro cu ta delibera ariba tur peticion di retiro entrega na Departamento di Labor y Investigacion pa un of mas dunado di trabao cu e meta pa por ricibi un permiso pa termina un relacion di trabao cu un of mas trahado. Un comision independiente cu ta consisti di representantenan di organisacion di dunado di trabao y representantenan di e mundo di sindicato (Artikel 3 Landsverordening Beëindiging Arbeidsovereenkomsten). Na tur cliente di Departamento di Labor y Investigacion cu tin caso relaciona cu e permiso aki ta anuncia cu e Comision di Retiro ta bay cu vacacion di 15 di december 2022 te 11 di januari 2023. Tur peticion pa por termina un relacion di trabou ta keda den proceso. Casonan cu ta rekeri pa bay Comision di Retiro y cu ta pendiente di e proceso di contradeci (verweerproces) lo mester tene cuenta cu un retraso den esaki. Januari 2023 tur caso pendiente lo wordo entrega na Comision di Retiro.

APPAREL **BOAT ACCESSORIES**

TODOMAR

f TodomarAruba @TodomarAruba TodomarAruba +297 585 0555

FISHING TACKLE **FIBERGLASS PRODUCTS**



Mirrors Beauty Academy ta ofrece e siguiente servicionan

Laba
Corta
Blowdry
Keratina
Cold Wax

Tinja
Highlights / Mechas
Ombre / Californiana
Bayalage
Peinado

Makeup
Threading
Barberia
Manicure
Pedicure

Y
mucho
mas!

Tel. Alejandro: 564-4412 of 582-0110 • Whatsapp: 732-0110 of 566-0110 • Adres: Ponton 76 - Suite #3

Parlamentario Berlis ta confirma incapacidad di gabinete Wever Croes II

E miembro di fraccion di MEP den Parlamento, Marco Berlis, den fin di siman a emiti un comunicado di prensa den cual practicamente ta confirma incapacidad di su propio gobierno cu e ta sostene, esta gabinete Wever Croes II, di incapacidad pa atende cu interes di pueblo.

Na Papiamento tin un dicho crioyo cu ta bisa, “papia pa papia” y Berlis pa di tantisimo ocasion, ta haci su mes culpabel na esaki, caminda e ta atende algun tema, cu simplemente e no tin conocimiento di esakinan. Su falta di conocimiento politico tambe ta hunga un rol den esaki cu cuestionando cosnan cu e no mester cuestiona mientras cu su falta di conocimiento di politica di e pais, ta pone muestra hopi malo. Den fin di siman Berlis a emiti un comunicado di prensa den cual e ta acusa comerciantenan di ta esunnan culpabel di prijsnan halto di comestibel aki na Aruba y cu esaki no ta culpa di gobierno, uzando algun argumento cu simplemente no ta basa riba ningun argumento logico y real.

Sinembargo den e proceso pa culpa comerciantenan y no su gobierno di mal maneho, Berlis en realidad ta practicamente confirma cu gabinete Wever Croes II no por sali na defensa di pueblo y defende su interes manera ta su obligacion di haci. Segun Berlis ta comerciantenan ta esunnan cu ta aumenta prijs di tur cos, ta comerciantenan ta creando un inflacion cu nan decision constantemente di aumento prijs di tur producto cu ta drenta den tienda. E no a papia of sikiera haci un apelacion riba gobierno e ora, pa percura pa un miho control, percura pa un supervision mas efectivo di departamentonan di gobierno riba un desaroyo cu su persona mas ta confirma di ta existi.

Ningun momento Berlis a presenta un idea di su parti of den number di su fraccion caminda lo por alivia e peso grandi aki di inflacion pa pueblo pero ta prefera di mira den direccion di otronan, acusando comerciantenan di ta esunnan cu ta aumentando prijs di productonan tur caminda. Berlis tampoco a presenta na pueblo un concepto di ley cu cual e pueblo ta mas protegi contra di e supuesto comerciantenan cu segun e parlamentario di MEP, esunnan cu ta aumenta

prijs di productonan pa pueblo.

No ta prome bes cu e miembro di fraccion di MEP aki ta trece articulonan politico dilanti cu ta controversial ya cu dos siman pasa tambe el a cuestiona su colega den Parlamento, Benny Sevinger di ta un politico cu mester a retira for di basta tempo caba.

Den e proceso aki Berlis a lubida cu Sevinger como candidato number 29 riba lista di AVP, a saca casi tres bes mas hopi voto for di pueblo votado compara cu loke su persona a ricibi y en realidad Benny Sevinger ta eligi directamente pa Parlamento, mientras cu su persona no tabatin suficiente voto personal pa drenta directamente despues di eleccion.

Cuatro persona deteni y arma confisca na Pos Chikito

Dia Domingo atardi DAR1 (Recherche Oranjestad) en conexion cu un investigacion andando a haci un entrada hudicial na un cas na Pos Chikito. Na dicho cas a detene en total 4 sospechoso.

3 hende homber: A.R.G. naci na Aruba di 23 aña, J.C. naci na Sint Maarten di 28 aña, A.R.G. naci na Aruba di 57 aña y 1 hende muhe W.W.L. naci na Aruba di 31 aña. Mirando embergadura di e caso a haci uzo di e team di aresto. Na dicho cas a confisca un arma di candela y municion.

Pa Cuerpo Policial por resolve mas caso cooperacion y informacion di pueblo di Aruba ta hopi importante, p'esey nos ta pidi si bo tin cualkier informacion yama nos tiplijn di Polis cu ta: 11141. Nos ta garantisa cu bo ta keda anonimo pa bendemento di droga.

Accion 21:

Contesta di van Huffelen na Mansur su carta



Diabierna 9 december 2022 Secretaria di Estado van Huffelen a contesta Lider di Fraccion Accion 21, Parlamentario Miguel Mansur, su carta di 24 october 2022. Den su contesta na Mansur, van Huffelen ta declara cu ainda tin preocupacionnan serio tocante sostenibilidad di Aruba su finansa publico. Cambionan anuncia na Presupuesto 2022 cu a sosode despues di CAft su conseho ta e motivo cu Rijksministerraad no a implementa e recomendacion pa un aanwijzing segun e Secretaria di Estado. Despues cu gobierno a modifica presupuesto di Land Aruba bao menasa di un aanwijzing e deficit lo ta dentro di e meta estableci y consecuentemente Rijksministerraad a dicidi di no duna un aanwijzing.

Den un carta na Gobierno di Aruba, van Huffelen a expresa preocupacion di Rijksministerraad tocante e estado di finansa publico di Aruba y a pidi Gabinete Wever-Croes II incorpora e cambionan anuncia den un nota di cambio na Presupuesto 2022 cual a sosode. Secretaria di Estado tambe a referi Parlamentario Mansur na su carta di 21 october 2022 na Tweede Kamer den cual e ta anuncia cu el a pidi Aruba haci cambionan na Presupuesto 2023 pa cumpli cu e normanan di entre otro un surplus di 1%. Den dicho carta van Huffelen a pidi Aruba duna prioridad na discusion di e rijks-wet RAft mirando cu e LAft ta caduca fin di 2023 y e prestamonan di Hulanda ta caduca 10 october 2023.

Dia 21 november 2022 Mansur a ricibi un carta di Griffier di Commissie Koninkrijksrelaties Tweede Kamer indicando cu dicho Comision a instrui Secretaria di Estado pa manda nan un copia di su contesta na e Lider di Accion 21 pa dicidi si nan lo trata su carta mas leu. Di su banda Mansur ta agradecido pa e contesta di Secretaria di Estado y Comision Koninkrijksrelaties Tweede Kamer. Sinembargo e ta lamenta cu cumplimiento cu e normanan lo bin a base di mas medida luga di reduccion structural den gastonan di gobierno. CAft, IMF y otro instancianan tin años ta pidi gobierno reduci su gastonan di un forma structural. Aruba ya caba tin algun di e nivelnan di belasting mas halto na mundo. Tambe nos tin algun di e gastonan di produccion mas halto di nos region, esey ta sigui impedi no solamente nos crecimiento economico pero tambe diversificacion di nos economia. Administracion publico mester sosode di un manera mas eficiente y menos costoso si nos kier logra un economia dinamico cu miho oportunidad pa tur Mansur a declara.

JUNGLE Cafe
BREAKFAST LUNCH

Christmas MENU

It's The Most Wonderful Time of the Year

- Sopi Pampuna
- Ayaca
- Pan de Jamon
- Ham di Pasco
- Salada di Macaroni
- Quesillo

Afl 40.00 p/p

Jungle Cafe, Tataratata 15, Coral Plaza
FOR MORE INFO CALL (+297) 731-1224

WARDACOSTA TA DUNA ASISTENCIA NA PERSONANAN CU BOTO A BOLTER RIBA LAMA

Diadomingo tardi Wardacosta a ricibi un notificacion di central post di polis encunto un boto cu lo mester a bolter na altura di Santo Largo. Cu maximo urgencia un Metal Shark di Wardacosta a sali pa brinda asistencia na e hendenan. Na yegada enberdad a topa un boto cu matricula A-2368 di bolter cu 4 persona cu tawata tene n'e boto. Agen-

tenan di Wardacosta a tuma e hendenan, dos hende homber y dos hende muher abordo di e Metal Shark. E personanan a declara cu nan a sali cu e boto pa bay test esaki y un ola a bolter e boto. Wardacosta a hiba e personanan y e boto na e ex pier di 'Brisas del Mar'. E personanan a pasa den un susto pero nan a yega bek tera sano y salvo.



Homber cu a maltrata muhe ariba parkeerplaats deteni



Alejandro Duque Beauty Salon

Yama pa un cita pa tur bo
corte di cabey, tiña y blow



Yama pa un cita: (297) 564-4412

Diadomingo den oranan di anochi polis a bay n'e parkeerplaats di Alhambra, unda un homber lo tawata maltrata un hende muhe. Na yegada, e homber a bandona e sitio, pero algun persona lo a sigui'e y a avisa polis cu e homber a cana asina lihe te yega unda antes tawata ex Bushiri Hotel.

Polis cu a yega n'e sitio mesora a acerca e homber y despues di un rato a detene. Di eyan nan a bay bek direccion Alhambra pa tuma declaracion di e dama cu a wordo maltrata.



SCHEDULE DI WEGANAN QATAR WORLD CUP 2022

Quarter-Finals

Diabierna, 9 december 2022

11am — Croacia vs Brazil

3pm — Hulanda vs Argentina

| | | | |
|----------------|------------|------------|------------------|
| Croacia | 1 4 | 1 2 | Brazil |
| Hulanda | 2 3 | 2 4 | Argentina |

Diasabra, 10 december 2022

11am — Maroco vs Portugal

3pm — Inglatera vs Francia

| | | | |
|------------------|----------|----------|-----------------|
| Maroco | 1 | 0 | Portugal |
| Inglatera | 1 | 2 | Francia |

**EDICION NOBO TUR
DIALUNA Y DIAHUEBS
NA AWEMAINA.COM**

WWW.AWEMAINA.COM/LATINOS-AL-DIA

**LATINOS
AL DIA**

SEMI-FINALS | 3PM

DIAMARS, 13 DECEMBER 2022

ARGENTINA VS CROACIA

DIARANSON, 14 DECEMBER 2022

FRANCIA VS MAROCO

NPC
**E DIFERENCIA
DEN NOTICIA**

WWW.FACEBOOK.COM/NPCARUBA

HAYA NOS RIBA:



3RD PLACE PLAY-OFF | DIASABRA, 17 DECEMBER 2022 11AM

VS

FINAL | DIADOMINGO, 18 DECEMBER 2022 11AM

VS

Maroco ta keda invicto

E ekipo di Maroco ta keda sorprende den e Copa Mundial Qatar 2022. Na caminda pa semi final nan a gana Belgica, number 2 di mundo. Spaña, number 7 y diasabra ultimo ey, Portugal kende ta number 9 di mundo. Nan a unicamente concedi 1 gol den 5 wega, cual tabata un auto gol contra e ekipo di Canada

Con nan ta haciendo e? A puntra diferente miembro di e ekipo y nan mes no sa. E unico contesta ta: "Nos ta un ekipo, un team, un famia. Nos no ta keha pa net net nada. Lanta tur dia gradici cu nos ta na bida y prepara lo miho posibel pa e contrincante nos dilanti". Un ekipo traha pa 12 Marocano, 4 Hulandes, 4 Belgica, 3 Spaño, 2 Frances, 1 Italiano y 1 Canades. E nacionnan aki ta unda nan a nace, pero nan rais ta di origen Marocano. Nan a keda sin scoge nan pais di nacimiento pa a hunga pa Maroco.

Portugal, cu un biaha a cuminsa sin nan estelar Cristiano Ronaldo, a hasi todo lo posibel. Pero e defensa tabata bon planta y nan no a logra marca gol. Mester bolbe remarca cu e keeper di Marocco, Bono, tabata e rol mas integral den logra esaki. Cu esaki tambe,


Ronaldo lo muy probablemente termina su carera deportivo sin a logra gana e unico copa cu e falta, cual ta e Copa Mundial.

Maroco asina aki ta bira e prome ekipo Africano pa alcanza un semi final den un copa mundial. Hopi ta esnan cu a critica e manager Fernando Tatos pa e hecho di a laga Ronaldo un biaha mas riba banki. Nan por a compronde e ronde di 16, cu a wordo despota entre Portugal y Suecia. Aunke no ta balota niun ekipo, Suecia no ta un di e pais nan mas dificil pa gana. Por a mira esaki tambe den e score, despues di Portugal a gana 6-1. Pero pa a tuma e mes un decision aki pa un cuarto di final, no a wordo nada bon acepta. Por ta e caso cu a balota Maroco como un ekipo cu no lo ta dificil? E unico ekipo cu no a perde un partido ainda? Pa es motibo aki e no tabata un sorpresa cu despues di e partido, Fernando a anuncia su retiro de inmediato di e seleccion

Awo ta di warda wak e reaccion di Ronaldo, kende te cu awo, no a duna ningun comentario, si di berdad

nos a wak e hunga su ultimo partido den e seleccion di Portugal.

Maroco lo sigui awo den semi final contra e ekipo di Francia, kende nan ta e campeon di 2018. E partido aki lo tuma luga diaranson pa 3or di atardi.



Francia 1 wega leu di defende nan titulo

Francia, e campeon nan di 2018 y un di e popular nan gana e mundial 2022, ta na 2 wega leu di por haci esaki posibel. Despues di a perde sorprendentemente contra di Tunisia den e prome ronde, nan no a haci wega mas. Nan a bin ta gana hopi convencivamente. Nan ultimo contrincante tabata Inglatera, diasabra ultimo den e partido di cuarto di final. Cu un score di 2-1 nan a sel-la nan pase. Por remarca cu e tabata un wega di hopi bon nivel. Tur 2 ekipo a demostra bon dominio di e bala, defensivamente y ofensivamente. Den pito, e capitan di Inglatera, esta Harry Kane, kende ta esun cu a anota e prome gol pa Inglatera via un penalty, ta bolbe haya un. Despues di basta reclamo di e hungadonan di Inglatera, e referee a dicidi di bay wak VAR pa asina controla si en berdad e mester duna Inglatera un otro penalty pa un falta basta pisa, den e area di gol. Basta lihe e la bin bek y a fluit e penalty. E capitan ta bolbe pasa man cu e bala, pero den su di 2 penalty, e ta faya esaki y ta manda un bala haltisimo riba e palo di gol. Un alegria enorme a reina den e ekipo di Francia, kende mirando e tempo riba e holoshi, por a sinti e sabor di victoria. Despues di algun minuut e referee a pita pa e final y asina aki a duna nan e pase pa e semi final di Mundial 2022. Awo ta toca nan Maroco. No lo bay ta facil. Maroco ta yega semi final ganando Belgica, Spaña y Portugal. E partido aki lo tuma luga mañan, 14 december pa 3or di atardi.



Copa Mundial Qatar 2022

E 4 ekipo nan pa Semi Final ta conoci



Tur cos ta cla pa e semi final di e Copa Mundial di Qatar. 4 ekipo, for di e total di 32 cu a cuminsa, awo aki lo bay bringa pa postula nan mes den e ultimo 2 miho nan di mundo. Argentina, kende a gana den un partido basta controversial y dramático, contra di e ekipo di Hulanda, lo bai enfrenta Croacia, e semi finalista di 2018. E otro semi final ta entre Francia, e campeon actual, y e ekipo sorpresa di e mundial aki, esta Maroco.

Croacia, kende tabata den grupo F, hunto cu e ekipo di Maroco, Canada y Belgica. Den e prome ronde nan ta empata 2 wega (Maroco y Belgica) y ta gana contra di Canada. Nan ta sigui den ronde di 16 y ta enfrenta Hapon y ta bay penalty. Mi ta kere nos por pone enfasis, cu bo no lo kier enfrenta nan den penalty debi cu e oportunidad pa bo gana, ta masha tiki mes. Den ronde di cuarto di final, nan ta bolbe bay penalty, e biaha aki contra di Brazil y ta gana nan 4-2, asina aki manda cas e pais cu mas chens tabata tin pa gana e Mundial 2022. Awo ta toca nan Argentina.

Argentina, kende a sali ta perde nan prome partido den grupo C contra di Saudi Arabia, ta bira gana Mexico y despues ta perde contra di Polonia. Niun hende a pensa di wak nan den e siguiente buelta, corda awo aki batayando den e ultimo 4 nan. Den ronde di 16 nan a enfrenta Australia y a gana 2-1. Den cuarto di final, nan a enfrenta Hulanda. Un partido cu lo ta un topico di conversacion pa hopi largo. Akinan Argentina a sa di gana Hulanda den penalty cu e score di 4-3.

Den e otro partido, Francia lo bay defende nan titulo di 2018. Den pool D, e tabata tin'e basta facil, ganando Australia 4-1, despues Dinamarca 2-1 y despues wordo sacudi pa Tunisia kende a gana Francia 1-0. Despues di wega ey nan no a tene piedad mas y a enfrenta Polonia den ronde di 16, y a haya 3-0. Den cuarto di final nan mester a enfrenta e ekipo di Inglatera, cu tambe ta conoci y a bin ta demostra un bon futbol den e mundial. Pero Francia a logra e victoria 2-1 riba nan. Awo, den semi final ta toca nan Maroco.

Maroco, e sorpresa nan di e mundial aki. Saliendo di grupo F, hunto cu Croacia, Canada y Belgica. Nan ta sali tabla, gana y gana respectivamente. Algo cu ningun a spera. Den ronde di 16 nan a encontra Spaña y ta gana den penalty cu e score di 3-0. Den cuarto di final Portugal. Cu un score minimo di 1-0 nan ta haya nan mes awo den semi final para contra di Francia. Por enfatisa cu e factor mas grandi cu nan ta unda nan ta awo aki, ta nan keeper Yassine "Bono" Bounou.

E partidonan aki, esta di Argentina contra di Croacia lo tuma luga awe, diamars pa 3or di atardi. Y esun di Maroco contra di Francia ta mañan diaranson, tambe pa 3or di atardi.

‘Xan Bogaerts to Xan Diego’

Popularidad di Xander Bogaerts na San Diego creciendo

Prome cu el a hunga su prome wega den uniform di San Diego Padres, e shortstop di Aruba, Xander Bogaerts ya tin su impacto riba fanatico- y dirigentenan di e ekipo aki. Diabierna ultimo durante di presentacion di e Arubiano pa Padres, ya caba e ekipo a produci cambionan den un poster promocional di e hungado, cu a bira masha popular den poco tempo un post di e ekipo riba Twitter, a conoce mas cu 25 mil followers cu den fin di siman a aumenta formalmente.

Un di e postnan cu a haya atencion ta caminda e ekipo ta pone: “Welcome Xander to Xan Diego” pues practicamente cambiando e nomber di e ciudad San Diego den Xan Diego, na honor di e shortstop di Aruba. Loke ta tanto fascinante pa tuma nota di e presentacion diabierna ultimo di Xander na San Diego, tabata e forma con nan ta a balorisa e cualidad di e hungado di Aruba, elogiando su capacidad tanto ofensivo como defensivo, cualidadnan cu su e ekipo den cual el a lanta, esta Boston Red Sox, masha poco a haci.


Gerente General di Padres, AJ Preller durante e presentacion di Xander diabierna na Petco Park, a mostra cu Bogaerts ta bin fortalece un infield cu ya caba ta hopi fuerte cu hungadonan manera Manny Machado, Fernando Tatis Jr, Ha-Seong Kim y Jake Cronernworth loke ta haci e ekipo ainda mas poderoso. Xander a ricibi for di man di e gerente general su uniform cu number 2 ariba, loke ta nifica cu el a mantene su number cu e tabatin den su estadia cu Boston Red Sox.

“Mi ta anhelando pa cuminsa e etapa nobo aki den mi carera, caminda e proximo 11 aña lo mi ta hungando aki pa resto di mi carera den liga grandi,” Xander a mostra.

Su estilo di “easy going type” mesora a pone cu el a duna e impresion cu e ta na cas caba y a gana admiracion di hopi hende den e organisacion caba pero na mes momento el a wordo ricibi cu hopi entusiasmo pa fanaticada tambe di e ekipo di Padres.

“Enter di Xan Man” ta otro expresion cu a uza den su presentacion diabierna ultimo loke tambe ta un indicacion di e gran aceptacion cu ya caba e tin cu e organisacion di Padres di San Diego.

Xander a firma un contract pa 11 temporada pa e suma di \$280 milyon cu ta duna e hungado un salario di \$25.45 milyon pa temporada y manera cu e mes a declara diabierna ultimo, e lo caba su carera cu e ekipo di Padres.



Dr. Dirksz y Tony Deny campeon “Nos cu Nos” team Snor!



Diadomingo ultimo, Team SNOR, e ekipo conoci pa nan uniform mas original den liga di domino, a tene nan ya conocido actividad anual titula “NOS cu NOS” n’e mundialmente famoso Domino Square Garden aya n’e grens entre Calabas y Kudawecha. Ya tempran den oranan di merdia fanatico y integrantenan di Team SNOR, bou liderazgo di “Snor” Perez a cuminsa yega pa asina e bataya entre nan mes por cuminsa 2’or di merdia.

E formato “NOS cu NOS” ta uno hopi gusta den temporada di fin di aña, ya cu e ta duna un bunita oportunidad pa bin hunto como coleganan di team, gosa e ambiente di Pasco, y alabes bataya otro formando ekipo di dos integrante pa logra saca cua ta e dos miembro di team cu ta miho p’e aña en cuestion. Na final, nan nomber lo bay den eternidad riba e wisselbeker famoso.

Mustrando nan caliber, e conocido Dokter den pega piedra, Dr. Tico Dirksz, hunto cu su patna Tony Deny, a bay tres rond invicto, pasando 2 sapato blanco, pa despues sinta warda confortablemente kendenan lo sali for di losers round pa bin challenge nan na final.

Aki a surgi e duo “Snor” Perez hunto cu Greg como nan contrincante p’e rondo final. Aki, Snor cu Greg ta pica bay



dilanti cu 1 - 0, pero di biaha Dr. Dirksz y Tony ta tuma control dje partido y ganando 2 wega tras di otro, incluyendo un sapato blanco, dr. Dirksz y Tony Deny ta logra titula campeon “NOS cu NOS” di Team Snor pa aña 2022! Un pabien grandi ta bay pa tur integrante y fanatico di Team Snor pa un aña hopi exitoso y por ultimo ta desea nan un bon Pasco y feliz 2023.

Iglesia Pentecostal di Aruba ta presenta:

Felicidad ta pa tur hende

IGLESIA PENTECOSTAL ARUBA
Ta Presenta
Diasabra 17-12-2022
FELICIDAD TA PA TUR HENDE!
7:00 AM - 3:00 PM

- Lo tin entrega di pañanan nobo (free)
- Tambe lo tin zapato y paña usa etc....
- Lo tin un vlooiemarkt cu articulo di cas
- Pa 11:00 cushina lo habri cu benta di cuminda

Lucas 2:10 - 2:14

Con bo ta sinti bo curason ora abo por haci un otro hende feliz, con bo ta sinti den bo curason, ora abo por pone un mucha hari. Y haci un hende grandi contento pasobra locual e no tabatin, of locual cu e no por a alcanza a yega na su porta. Bo tabata sa cu esey ta un mandato di Dios y e ta para skirbi den Mateo 25 :34-46.

Iglesia Pentecostal di Aruba situa net dilanti di Macro San Nicolas , tambe conoci como Dr Scheapmanstraat 18 ta hopi consciente di esey, p'esey nos kier invita bo pa diasabra 17 December 2022 for di 7am te 3pm pa bo bishita nos caminda nos lo ta entrega paña pa mucha, hende grandi, baby, sapato den bon condicion y tambe paña nobo, **gratis, pornada, free, como regalo. As a gift, als een geschenk.**

Y si bo ta falta algo den bo cas, manera semper nos tin e vlooiemarkt cu articulonnan hopi barata, na e prijs cu ta cumbini tur saco.

Pa 11am nos cushina lo habri pa henter pueblo di Aruba y specialmente, pa esnan cu riba diasabra ta bezig ta verf, chapi of haci cura limpi, nos tin e miho sopi cu ta duna Energia, Forsa y Curashi, nos tin tanto sopi di carni, como sopi di Galiña pa solamente 15 florin, y tambe Galiña Stoba pa solamente 15 florin.

Diaranson 14 di december for di 5pm y tambe riba diabierna 16 di december nos lo ricibi di esnan cu kier duna paña

y comestibel pa asina nos por bishita hende den necesidad, y haci nan tambe feliz, no lubida cu comestibel nunca no ta di mas, y corda cu no por trece nada cu tin di warda den ijskast. Tur locual bo curason ta bisa bo pa bo por yuda otro cune ta bon bini, tambe nos tin un lista chikito di articulo, cu bo por haya cerca nos y asina bo por busca y trece, corda check expiration date di comestibel, y e pañanan mester ta limpi y den bon condicion.

Durante siman di 19 di December pa 23 di December nos lo ta bishitando hogar y asina bendiciona esnan cu ta den necesidad.

Por tuma contacto cu nos of manda Whatsapp na tel: 7403237 / 6619150 / 5698426.

Tambe nos por whatsapp bo e lista di comestibel.

Tambe nos por entrega bo sopi of cuminda na cas of negoshi asina e pedido ta 10 of mas.

Si bo kier bendiciona un famia cu sopi of galiña stoba nos lo entrego pa bo, pero bo pedido mester alcanza 10 unidad.

Nos tur ta na altura di e necesidad cu ta biba den pueblo, p'esey nos ta conta cu bo sosten.

Felicidad ta pa tur hende.

Nos ta warda bo y dios bendiciona bo ricamente.

Prome Minister Evelyn Wever - Croes:

Feria di Pasco na San Nicolas tabata bon asisti, cu bon ambiente y yena cu positivismo

Danki na SNBA y tur persona cu a haci e evento posibel



Prome Minister Evelyn Wever - Croes a ricibi invitacion di San Nicolas Business Association (SNBA) pa asisti un feria di Pasco y cendemento di e mata di Pasco mas grandi di Aruba cual. Na e ocasion Prome Minister Wever - Croes a dirigi palabra na Ministernan, Parlamentarionan, Comerciantenan, esnan di SNBA y demas invitado y personanan presente.

Premier Wever - Croes primeramente a gradici presidente nobo di SNBA sr. Errol de Freitas pa e invitacion na e evento. Manera cu gobierno a bin ta anuncia, Aruba ta recuperando di e efectonan negativo di Covid. E aña cu ta cabando tabata un aña hopi dificil cu hopi reto pa cada persona sea ta riba tereno personal, familiar, trabou, gobierno, financiero y mas. Pero a pesar di tur esaki, ta cerando e aña cu speransa y positivismo. Prome Minister Wever - Croes a splica cu Covid a come un cuart di e economia, pero a mira tambe cu awor turistanan ta biniendo bek y ta calcula cu pa fin di aña ta yega 100% di e cantidad di turista compara cu prome cu pandemia. Ademas, situacion financiero poco poco ta wordo poni na ordo y asina ta mira cu e aña ta cera hopi mas miho cu el a cuminsa cual ta duna hopi mas speransa cu 2023 ta bay ta un miho aña.

Por ultimo, Prome Minister Wever - Croes a gradici cada persona cu a haci e evento posibel, specialmente SNBA pa ta un organizacion serio y determina den trece desaroyo pariba di brug y na San Nicolas. A gradici cada comerciante cu ta kere den pariba di brug y cu ta sigui inverti pariba di brug, y sin lubida cada persona cu no ta un comerciante pero cu ta carga un curason di yuda otro cual ta crea e conexion pa hunto trece bienestar den pueblo di San Nicolas.

‘E ta un honor pa mira con pueblo a reacciona riba e invitacion y asisti e evento, cual ta crea speransa y trece positivismo pa aña 2023.’

Periodo pa procesa werkboek

Director di Departamento di Labor y Investigacion ta informa lo siguiente. En conexion cu dianan di fiesta venidero, lo acepta y procesa peticionnan relaciona cu werkboek te cu diabierna 16 di december 2022 parti mainta.

Januari 4 di 2023 lo cuminsa bek ta ricibi peticion y procesa werkboek. Departamento di Labor y Investigacion ta pidi disculpa pa cualkier inconveniencia cu esaki por trece cune, y ta desea pueblo di Aruba un feliz y saludabel dianan di fiesta.

Minister di Finansa Maduro a reuni cu colega Minister di Finansa Kaag di Hulanda

Pa brinda informacion financiero di Aruba

Durante su bishita di trabou na Hulanda siman pasa, Minister di Finansa Xiomara Maduro a reuni cu su colega Minister di Finansa di Hulanda sra. Sigrid Kaag hunto cu su conseheronan. E motibo di e reunion tabata pa duna un bista di tur local Aruba a bin ta haciendo pa por pone nos finansa publico na ordo. Aruba tin un relacion nobo cu Hulanda na unda cu nos a presta placa di Hulanda pa por a surpasa e pandemia. Ta yega momento den aña 2023 cu Aruba mester cuminsa paga e debe aki bek y p'esey ta importante pa na Aruba nos por haya un bista di kico e condicionnan di pago lo ta. Cu e meta aki a reuni tambe cu Minister di Finansa di Hulanda pa e mandatario tambe por ta na altura di tur esfuerso cu ta wordo haci na Aruba pa drecha e situacion financiero di nos Pais, y nos intencion pa paga Hulanda e debe bek teniendo cuenta cu Aruba su capacidad di pago. Conforme procedura y palabracionnan actual, Aruba lo continua den dialogo riba e topico aki cu Secretario di Estado Van Huffelen.



Aplicacion ta habri na SKOA

Tur muchanan cu ta bay cuminsa kleuter por aplica

S KOA ta sigui cu su campaña anual di aplicacion pa tur mucha cu ta haci 4 aña den 2023. Aplicacion ta habri ainda y mayornan por inscribi nan yiunan pa asina segura nan luga pa e proximo aña escolar.

Con bo por aplica na SKOA?

Por aplica via nos website www.skoa.aw pa asina inscribi completamente online. Por aplica via e-mail door di manda SKOA un e-mail na aplicacion@skoaw.aw. Por aplica via WhatsApp tambe door di manda un mensahe directo na 7485995 y sigui e pasonan pa completa e aplicacion. Ora di aplica mester pone bon atencion ariba e documentonan necesario pa asina por cumpli cu e proceso di inscripcion di bo yiu. Pa mayornan cu ya caba tin yiu inscribi na SKOA por haci aplicacion di e yiu cu tin cu cuminsa kleuter via nos sistema di SAS.

SKOA ta enfoca ariba e desaroyo y crecimiento di nos muchanan y ta boga pa sigui brinda educacion di calidad pa asina prepara nos muchanan pa un bon futuro. SKOA t'ey pa guia tur mayor durante e proceso di aplicacion. Pa mas informacion tocante aplicacion y e scolnan di SKOA por bishita nos website www.skoa.aw of por yama na liña directo 5231800.

APLICACION

PA SCOLNAN DI SKOA A HABRI

Mayornan por cuminsa inscribi nan yiunan cu ta bay cuminsa nan prome aña di Kleuter na SKOA

APLICA ONLINE!

www.skoa.aw

APLICA ONLINE!

SCAN E QR CODE

Pa mas informacion
www.skoa.aw
+297 748 5995



Santo Rosario y Oracion na e monumento di “Inmaculada Curason di Maria na Sta.Cruz”



Grupu di Oracion “Inmaculada Curason di Maria ” ta recorda tur debotonan di Mama Maria cu awe, **13 di december 2022**, tur deboto y fielnan ta reuni pa 6or di atardi na e Monumento di Inmaculada Curason di Maria na Sta. Cruz. Ta resa rosario prome cu Santa Eucaristia.


Awe tur hende ta bin resa misterio Doloroso. Aunke cu nos ta ansioso pa e dia grandi di nacemento di Cristo yega, laga nos ta bon prepara, si prepara nos mes spiritualmente. Manera di atende misa di aurora. Ta un sacrificio grandi pa lanta den marduga pa sinti e esfera di Pasco.

Si tur cas tin nan pesebre, unda cu tin paz y humildad. Cu un angel ta cuida nos, cu ta trece e bon noticia. Huan Bautista tambe a anuncia e binida di Cristo.

Mayornan nan obligacion ta pa cuida nan yiunan, duna nan bon ehempel. Respeta bo crianan y nan lo respeta bo. Unda cu nan bay, na school den deporte cu amistadnan of den nan trabou. Loke nan haya na cas, nan ta sigui cu e custumber di cas. Cu Dios bendiciona Aruba. Otro aña lo ta diferente, cu otro añanan. Biba cu perspectiva, haci cambio den bo hogar. Pone Dios central den bo hogar. Resa Santo Rosario, asisti na Santo Sacrificio di misa. Fin di aña ta bon pa haci un bon proposito pa e aña nobo.

Pasa Un bon Pasco den seno familiar. Cuminsa un Aña Nobo Yen di Felicidad.

Minister di Finansa y Cultura Maduro ta felicita 'Blackout' cu premio di Best Feature Film na India



| | | |
|--|-------------------------|-------------------------|
| 10th year LAKE CITY INTERNATIONAL FILM FESTIVAL An initiative of Eon Films | | |
| INTERNATIONAL CATEGORY | | |
| FEATURE FILMS - WINNERS | | |
| BEST FEATURE FILM | BLACK OUT | ANGEL ANTONIO SOTO |
| BEST DIRECTOR | LABYRINTH | XUE MA |
| BEST ACTOR | LABYRINTH | WEIHAO XU |
| BEST ACTRESS | A BEAUTIFUL BREAKUP | MATYLDIA BAUER |
| BEST MUSIC | A BEAUTIFUL BREAKUP | ILAIYARAJA |
| FEATURE FILMS - RUNNER UP | | |
| BEST FEATURE FILM | NIGHTLINE | JIRI TUCEK |
| BEST DIRECTOR | A FATHER'S DIARY | GOLAM MUSTOFA |
| BEST ACTOR | A BEAUTIFUL BREAKUP | KRISH MUDRAGADA |
| BEST ACTRESS | LABYRINTH | YUEYI WANG |
| SHORT FILMS - WINNERS | | |
| BEST SHORT FILM | THOU ART THAT | PRADYUMNA CHATTERJEE |
| BEST LONG SHORT FILM | BROTHER TROLL | GUDMUND HELMSDAL |
| BEST ANIMATION FILM | EXPANDED COEXISTENCE | SEUNG-IL CHON |
| BEST DOCUMENTARY FILM | THE LAST BALAFON MASTER | GÖTZ RAIMUND |
| BEST EXPERIMENTAL FILM | WALK OF COURAGE | JOHANNES PAUL OLSZEWSKI |
| BEST MOBILE FILM | NAME TO THE FACE | QUINN QUINLAN |
| BEST WEB SERIES | RAINBOW | YUN HYUK KIM |
| BEST DIRECTOR | THOU ART THAT | PRADYUMNA CHATTERJEE |
| BEST DIRECTOR DOCU | ID-TAL | YAMINI MAKESHWAR |
| BEST ACTOR | THE GLANCE | JEK JUMAWAN |
| BEST ACTRESS | PERDRE/ TROUVER | DIAHNNA NICOLE BAXTER |
| BEST STORY | TRANSRESSOR | PAWAN SAHNI |
| SHORT FILMS - RUNNER UP | | |
| BEST SHORT FILM | MARY'S ROOM | CHRISTOPHER MITCHELL |
| BEST LONG SHORT FILM | COMMA | MARTIN JESUS KOZLOWSKI |
| BEST ANIMATION FILM | THE END | ALEXANDRIA SIAH |
| BEST DOCUMENTARY FILM | WHEN THE DUST CLEARS | BART CAO |
| BEST EXPERIMENTAL FILM | VEILS | MARIE MURATA |
| BEST DIRECTOR | 444 | CHRISTOPHER MITCHELL |
| BEST ACTOR | TRANSRESSOR | SUNIL PATEL |
| BEST ACTRESS | LADY DARB | SARAH O'BRECHT |
| BEST STORY | LIONESS | SARA OLIVA |

Recientemente e pelicula Blackout di director local Angel Soto a gana e premio di Best Feature Film na e Lake City International Film Festival (LCIFF) na Delhi, India. E pelicula Blackout ta enfoca riba e importancia cu Aruba tabata tin e tempo di Segunda Guerra Mundial unda e refineria Lago y Arend tabata obheto di atake di e Alemanan pa motibo cu nan tabata e refinerianan mas grandi na mundo cu tabata yuda e aliado nan cu producto petrolero.

Mas cu 45 diferente pais a competi den e festival aki durante cual Aruba a destaca y asina gana e categoria di Best Feature Film. Banda di e logro aki, e pelicula Blackout tambe a ricibi tres nominacion na e Northeast India International Film Festival (NIIFF) den categorianan di Best Feature Film, Best Director y Best Male Actor. E festival lo anuncia e ganadonan dia 12 y 13 december venidero na Dimapur, Nagaland. Un bes mas talento, creatividad y cultura di Aruba ta wordo exponi riba tarimanan internacional. E reconocimiento y premiacion di e pelicula Blackout ta muestra cu na Aruba tambe tin talento y capacidad pa destaca den cinematografia. Reconocimento for di festivalnan renombra ta muestra cu na Aruba tin hopi talento y potencial pa sigui desaroya e habilidad creativo y cinematografico. Minister Maduro ta felicita director Angelo Soto y e ekipo tras di e pelicula Blackout cu e bunita logro aki.

Na ocasion di 200 aña di existencia di kerki protestant di Aruba

E intencion di binimento hunto durante e luna di december aki ta pa alaba Dios, pa nos disfruta dje maraviya di e amor cu Dios ta duna nos cu binida di Su Yiu y pa invita hende pa profundisa nan creencia y/of bolbe haya e conexion cu Dios.

Diasabra 17 di december

Cantamento hunto y Concierto di Pasco di Kerki di Oranjestad 2022
Canta canticanan di Pasco hunto, scucha textonan importante di Bijbel y anticipacion di un bunita Pasco yena cu bon sentimento. Cu participacion di varios musico y hopi cantamento hunto. Un anochi di devocion, musica, poesia y canto di Pasco. Despues di e concierto lo tin Pan di Pasco y Glühwein den cura patras di kerki cu lo ta dorna y ilumina cu bela.

Musiconan presente:

Bert Rodenburg, orgel
Padre Jairo Maduro, trompet
Pearl Peters, piano
Viola Heutger, violin
Ruth Bonevalle, violin
Nora Ritter, violin

Kerki di Oranjestad, diasabra 17 di december, 7 PM. Kerki lo ta habri for di 6.30 PM.



HoneyPot ta anuncia nan di 4 Video Clip pa aña 2022

Manera tur hende sa, na inicio di 2022, HoneyPot a lansa e super hit song "You don't have to go away" un tema pa conscientisa nos comunidad en general, specialmente nos hobennan adulto, cu ta cay den e stage di depresion of otro enfermedad mental.

Despues di e acogida grandi di e cancion aki, publico a pidi pa mas version. E tema compone pa Chayo Tromp, a bay diferente radionan local como # 1 pa simannan largo ariba nan billboard! E titulo ta bisa nos, cu maske e bataya ta hopi grandi pa lucha cu ne, toch mester busca pa pasa door di dje y busca ayudo. E video clip y e prome version a logra impacta nos comunidad inmensamente y asina tambe a pidi pa un otro version.

Debi n'e acogida, a dicide pa lansa e



Lyrics Video Clip, version acustico hunto cu Darrel Lacle (Bass) Chayo (vocals y guitar), den studio di Hubert Thiel, cu sin duda a haci un bon trabou. E lyrics video tabata den mannan di e profesionalnan Dany Cruz y Marlon Dubero. HoneyPot hunto cu tur esnan envolvi pa cu e tema aki, ta trece den un bachi nobo nobo...e biaha aki den e

Version Acustico!

Danki Aruba, prensa y fanaticonan pa duna HoneyPot un cobertura asina amplio, durante hopi aña pa sigui produci y aporta na cualkier conscientisacion, specialmente cu e tema aki, cu ta awor dedica na un y tur! "You don't have to go away".

Minister di Finansa Xiomara Maduro relaciona cu Dia di Belasting na empleadonan di DIMP:

Sin boso esfuersonan y determinacion den boso trabou nos pais no por sigui progresa



Diabierna mainta Departamento di Impuesto a organisa un mainta special pa su empleadonan relaciona cu Dia di Belasting. Minister di Finansa tabata presente y a hiba palabra. Den su discurso e mandatario a trece dilanti cu awe ta recorda Dia di Belasting cual ta 1 di december y ta un bon momento pa nos, funcionarionan di gobierno, reflexiona riba e logronan di un organisacion asina importante pa recuperacion di nos pais. Departamento di Impuesto tin un tarea cu ta carga un responsabilidad inmenso y cu no tur ora ta facil. Enfora cumplimento di pagonan di impuesto tin su retonan y mey mey di tur e retonan aki, nos belastingambtenaar ta percura pa colecta entrada di impuesto pa asina Aruba henter por beneficia di e frutanan.

Minister Maduro a accentua cu sin nos esfuersonan y determinacion den nos trabou nos pais no por sigui progresa. E logronan di awe ta danki na perseverancia y dedicacion di cada un di trahadonan na Departamento di Impuesto cu ta haci e diferencia na pia di trabao. Desde pandemia, nos pais a confronta diferente desafionan riba tereno di entrada di impuesto y nos economia. E mandatario a trece dilanti pa laga nos no perde for di bista cu nos tin cu sigui traha hunto pa logra e metanan nos dilanti. Nos ta hunto riba e caminda pa mejoracion, pues laga nos sigui inspira y motiva otro tumando iniciativa y asumiendo e responsabilidad pa nos metanan stipula.

Minister Maduro ta felicita henter e ekipo di Departamento di Impuesto pa e inmenso trabou den e ultimo lunanan pa logra elimina e famoso atraso den procesamento di cobranza y restitutie di varios aña. Danki pa trece e organisacion up-to-date den 2022! Un danki di curason y na cada un di e trahadonan pabien! Un dia sumamente placentero den compania di boso coleganan!

Indocumentadonan ta wordo trata segun regla y leyman stipula

WILLEMSTAD – Recientemente Ministerio di Husticia y gerencia di SDKK a tuma nota di un informacion cu ta circula den medionan di comunicacion, encuanto di un grupo di famia cu a protesta riba e trato cu e indocumentadonan ta ricibi diariamente na e Vreemdeling Opvang en Detentie Centrum (VODC). Primeramente Ministerio di Husticia y Gerencia di SDKK kier enfatisa cu diariamente ta maneha e compleho di VODC segun procedura y ley, esta siguiendo tur tratadonan stipula pa cu maneho di indocumentadonan.

Pa cu e protesta cu tabatin di famianan di e indocumentadonan riba e trato medico, consumo y posibilidad pa comunica, Ministerio di Husticia kier informa cu tur indocumentado ta ricibi atencion medico debidamente na momento cu tin cualke caso medico dor di departamento medico di SDKK.

Tambe pa loke ta trata e consumo diario, tur clientenan di prizon y indocumentadonan na VODC ta ricibi cuminda tres biaha pa dia, esta desayuno, lunch y cuminda di atardi. Un dietista ta hinca e menu di dia den otro y controla esaki. Pa loke ta trata e posibilidad pa comunica cu famia y conoci, tin cu indica cu tur indocumentado por haci yamada telefonico ilimita via telefonnan cu tin disponibel, basta cu nan tin carchi pa por bel. Tambe nos tin cu informa cu 1 biaha pa siman, tur indocumentado por haci uzo di e sistema di



bishita virtual (video call) pa por comunica cu nan famia y conocinan. Finalmente Ministerio di Husticia kier recorda cu recientemente mester a opta pa habri e compleho nobo di VODC na momento cu a intercepta e ultimo lancha.

Den e dlanan cu a pasa Gerencia di SDKK a bin ta haci tramitenan pa operacionalisa e compleho nobo conforme ley y normanan internacional. Ainda tin algun trabou di construccion chikito pendiente y tambe un parti di e inventario cu a cumpra den exterior cu mester yega. Esaki no ta kita cu tur dia ta duna contenido n'e programa di e indocumentadonan.

Pa falta di placa y personal:

Sistemanan tradicional riba tur tereno ta bashando abou

WILLEMSTAD - E sistemanan tradicional riba tereno di cuida medico, enseñansa y husticia ta bashando abou. Hopi biaha ta pa falta di placa pero tambe pa falta di personal competente.

Hopi yiu di tera ta bandona nos pais pero e grupo di poblacion mediano mas grandi cu te ciudadano a bira mas activo no solamente den bario pero tambe den plantacion di alimento. Dia campeonato mundial di futbol caba na Qatar, aña nobo lo bolbe bira un aña dificil y mester haci cambio di vision y reforma.

E supuesto excuus cu Hulanda lo ofrece compaña cu un saco di placa pa paga pe pasado di sclavitud lo no cambia nada. Dia 16 di december lo discuti riba e analisis aki cu enfoca riba ki te posibilidad y accion concreto.

Y esun cu por indica mas claramente ki direccion Vision Corsou 2030 ta indica lo gana un premio.

Condicionnan 'machete'

WILLEMSTAD - Na momento cu pueblonan den Caribe cu ta asocia cu Hulanda mester por tabatin tranquilidad pa sikiera mira partidonan di campeonato mundial y consola otro cu e derota di nan ekipo nacional, 'machete' a subi mesa. Un manifiesto cu ta boga pa beneficiar material pe descendientenan di e victimanan di sclavitud.

EXIGENCIA: E palabra 'nigger' mester bira castigabel. Zwarte Piet mester esfuma for di mundo manera arete di magia (sic!). Solamente si cumpli cu e exigencianan aki y un letania mas partidonan politico na Surinam y Aruba ta bay di acuerdo cu e excuus publico cu gabinete Rutte kier expresa. Nan kier pa Hulanda presenta un programa cu fecha concreto riba cual e retraso di descendientenan di catibo ta soluciona. E organisacionnan kier pa Hulanda pordona e debe nacional di nos paisnan den Caribe y di Surinam. Nan a exige pa Hulanda lanta un fondo di reparacion structural pa institucionan y organisacionnan cultural di hende preto.

Hulanda kier mira demanda di paisnan den Caribe riba papel

WILLEMSTAD - Posicion di Hulanda ne momentonan aki ta cu nan mira exigencianan di Sint Maarten riba preto cu blanco riba papel. Hulanda no por paga su debe pa sclavitud cu 200 milyon Euro. Gobierno di Sint Maarten no ta cla pa contesta e oferta di Hulanda pa tuma un cheque di 200 milyon Euro a cambio di absolucion di culpa paga e periodo di catibo den su ex colonia.

E prome minister di Sint Maarten ta kere cu prome cu esey mester tene discusion cu comunidad y parlamento prome cu Sint Maarten por duna un contesta firme.

Nada di un declaracion fofo of djis pa admiti cu tempo di catibo nan a comete atosidad contra e catibonan cu ta un crimen contra humanidad; 'Mi ta pidi disculpa, tuma ata un cheque pa 200 milyon Euro y nos ta cla cu otro'.

Di otro banda e prome minister a splica cu Hulanda a garante cu no t'asina cos ta bay. Pero como mandatario dje pais e mester warda pa mira y tende e splicacion y Hulanda y haya tempo pa analisa e proposicion.

Gobierno di Sint Maarten te ainda tin pregunta riba cual nan kier contesta aunke e mandatario a reacciona cu Rey Willem Alexander tambe a laga haci un investigacion si Cas Real di Hulanda tabata involvi den e barbaridadnan. E monarca a haci e observacion pasobra awor prome Minister Mark Rutte a declara contrali na loke el a declara aña pasa. Rey Willem Alexander a reafirma cu si nos kier sigui progreso den Reino, pueblo di Sint Maarten mester haya mas informacion y preparacion pa dialoga kico e disculpa aki ta nifica pa e paisnan den Caribe.

Hulanda a crea un donderbos maton!

Un oferta pa pidi pordon a bira letania di exigencia!

WILLEMSTAD - Faltando solamente un siman pa cumpli cu e fecha cu Hulanda mes a stipula pa gobierno Hulandes pidi descendiente di catibonan (e.o.) den ex colonianan Hulandes pe barbaridadnan cu nan antepasadonan a comete, e fecha di 19 december proximo yegando su momento di explota. Cu un ehempel di torpesa historico, Hulanda unilateralmente a fiha e fecha pa na cada un dje paisnan di Antia, un (1) minister Hulandes pidi pordon. Anto no cualke minister descendiente pero un minister macamba blanco. Aparte cu sin consulta y aviso previo anunciando e fecha riba cual Hulanda kier pidi pordon, e minister ta na caminda caba pa Surnam.

Cu e decision aki, Hulanda a desencadena un reaccion di rechazo y censura cu por bay para te den e tribunalnan di mas halto na mundo.

Ultimatum candeloso

Mester reconoce cu den e animo di rechazo loke Hulanda

kier impone riba (ex) colonianan Hulandes, Surnam tambe mas spuerto mientras cu gobierno di Corsou y Aruba mes tabata na soño. Of nan tin miedo di protesta contra Hulanda considerando cuanto cos nos pais por perde si nan hunga rol di rebelde.

Surnam tabata mas pro-activo cu Corsou y nos socionan estatal te cu nan a forsa bara obligando gobierno Hulandes pa manda un Minister Hulandes bay tira zeta riba e olanan violento cu politiconan Surnameño a crea den e forma di protesta.

Demanda ambicioso

Organisacionnan civil rebela tanto na Surnam como na Hulanda y a pone un paquete di exigencia hasta irealista como ultimatum. Un siman pa cumpli cu e fecha di pidi Surnam a pone machete riba mesa y Aruba tambe a bin cu nan version di machete.

Fortaleza Pa Famia

CRISTO HESUS A BINI, PA LIBRA NOS DI LEY DI PICA Y MORTO

ALELUYA, Dios ta un bon Dios, y E ta cuida tur ser humano aki na mundo, pasobra Dios ta stima nos tur igual. Ta p'esey Dios a manda su yiu unigenito aki na mundo pa ken cu kere den dje no bay perdi ma haya bida eterna.

Kico Dios a haci pa nos? **Romanonan 8:2 ta para skirbi:** Pasobra e Ley di Spirito di bida den Cristo Hesus a haci mi liber di e Ley di pica y di morto.

Esey ta pa confirma cu Cristo Hesus no a bin pa condena, pero pa salba, ta pa habri wowo di tur hende cu asina cu presenta : Un ley cu ta duna bo derecho pa peca, y biba den pica.

Cual ta legalisa inmoralidad y falta di respet pa Dios.

Cual ta condena bo bida na pica.

Kitando bo oportunidad di hereda bida eterna den Cristo Hesus.

Cu no tin ningun clase di interes pa bo Integridad ,bienestar familiar, fisico ni spiritual.

E ley ey no ta di Dios e ta simplemente di scuridad miho bisa diabolico.

E enemigo ta purba di drenta tur organisacion mundial, pa asina e por gara hende y causa destruccion, y esaki ta comprendibel pa nos tur, ora nos mira lidernan di paisnan grandi y chikito den gara di scuridad, y ta consenti cu bagamunderia pa complace cu maldad.

Pasobra e enemigo kier tabatin dominio den cielo, pero como e no a logra e kier purba eherce dominio riba tera, specialmente riba esnan cu ta biba den cierto rebeldia di inmoralidad, pa asina e por domina nan, pero nos tur sa cu su plan ta pa horta, mata, y destrui. (Juan 10:10)

Si Cristo Hesus a bisa nos pa stima Dios na prome luga cu henter nos bida, alma, forsa, y curason, y stima nos prohimo manera nos mes, anto nos tin di tene cuenta cu nos tur ta prohimo, y si bo mira bo prohimo ta cana den caya di destruccion bo mester hala su atencion fuertemente. Y si bo mira bo prohimo herida benta abao canto di caminda bo no por pasa bay lage. Pasobra con cu bo mire ta bo prohimo e ta, y nos mester obedece Dios.

Permiti nos duna un prueba di Dios su amor, y asina bo por diserni y reconoce maldad.

Ley di Dios ta bon, santo y husto. (Romanonan 7:12)

Ley di Dios ta berdad. (Salmo 119:142 y vers 151)

Ley di Dios ta perfecto, sigur, drechi, y puro. (Salmo 19:7-9)

Ley di Dios ta luz. (Proverbionan 6:23)

Ley di Dios ta spiritual. (Romanonan 7:14)

Ley di Dios ta constante. (Mateo 5:18)

E Ley di Señor e ta restaura alma

E testimonio di Señor ta fiel, e ta haci hende simpel bira sabi.

E preceptonan di Señor ta corecto, nan ta alegre curason.

E mandamento di Señor ta puro, nan ta ilumina wowo.

E temor di Señor ta limpi, e ta permanece pa semper.

E huicionan di Señor ta berdadero, nan tur ta completamente husto.

Asina aki nos tur ta mira cu esun cu ta den Señor no por biba bao di condenacion, pasobra no tin condenacion pa esnan cu ta den Cristo Hesus. (Romanonan 8:1-4)

Reconoce awor kico ta di Dios y kico ta di e malbado, reconoce scuridad,

y habri curason pa e luz berdadero di Cristo Hesus por briya. Laga nos sclama na Señor pa bienestar di tur hogar, famia y specialmente nos hobennan.

Dios tene misericordia.

Sinceramente, Pastor Marcel Balootje.



"Señor ta mi wardador, mi'n tin falta di nada.
Den cunucu di yerba berde e ta ponemi sosega.
E ta hibami na awa trankil, Pa mi bolbe haña
forsa". Salmo: 23.

Cu inmenso tristesa na nos curason pero
conforme cu Dios su boluntad, nos ta anuncia
fayecimento cristianamente di:

Sra Vda. Theresita Lucia Ridderstaat Kelly

Mihor conoci como: Chita, Mamai
*12 December 1935 † 6 December 2022
Vuida di † Dominico Ridderstaat, Buchi

Na number di su:

Yiunan:

Mena y Nicholaas Maduro Ridderstaat y
Yiunan.
Lorenzo y Marieta Ridderstaat Zievinger y
Yiunan.
Sonja Ridderstaat y Yiunan
Lorencia y † Carlos Ras Ridderstaat yiunan.
† Johannes y Melvina Banfield Ridderstaat y
Yiunan.
† Lourdes Ridderstaat y Siro Ras y yiu

Nieto y Nieta nan:

Francis Arcaya y Merlys Cortez y Yiunan.
Elizabeth Arcaya y Yiunan.
Yowelly Arcaya y Yiu.
Nigel y Zafiro Ridderstaat Pardon y Yiunan .
† Angelique Ridderstaat y Yiu.
Marcelino Grant y Yiunan.
Yoacani y Edson Wernet Grant y Yiu.
Yahaira Grant y Rene Samson y Yiu.
Jairo Grant
Jovanny Ridderstaat
Jovainka Ridderstaat
Yannick Ridderstaat
Sandy y Rosalba Ridderstaat Rasmijn y Yiunan.
Carlos Ras y Yiu.
Jesus Ras.
Doris Ras y Yiu.

Su bisnieto stima manera su yiu: Lorensly
Ridderstaat.

Tur Primo y Primanan, Tur Bisanieta y Bisanieta
nan, Tatara nieta y Tatara nieta nan Comer y
compennan, Ihanan, bisijana nan.

Tur famianan:

Kelly, Kock, Leest, Ridderstaat, Arends,
Zievinger, Quandt, Giel, Gomez, Boekhoudt,
Webb, Tromp, Lezier, Samson, Medina, Perez.

Acto di condolencia lo tuma lugar:

Diamars 13 December 2022.
di 7or pa 9or di anochi na Aurora funeral
Home.

Ta invita pa asisti na acto di entierro cual lo
tuma lugar **Diaranson 14 December 2022** na
Misa Santa Anna na Noord.

E restonan mortal di nos defunto Sra Vda.
Theresita Lucia Ridderstaat Kelly lo ta reposa
for di 2or te 4or den Misa y despues nos lo ta
saliendo pa Santana na Catolico na Noord.

Nos ta lamenta cu despues di entierro no por
ricibi bishita di condolencia na cas.

Nos ta pidi disculpa si den nos tristesa nos por a
lubida di menciona cualkier famia, amistad y/
of conoci.



"Dios ta amor, amor ta dios"

Cu profundo pena pero conforme
cu boluntad di Dios, nos ta participa
fayecimento di:

Sr. Frans Kelly

mihor conoci como Fay of Pon
na edad di 81 aña

Na number di su:

Esposa: Maria (Colin) Kelly-Croes

Rumannan:

† Pedro Kelly y yiu
† Tida Boekhoudt-Kelly y yiunan
† Jacobo Kelly y yiunan
Catrien Dreischor-Kelly y yiunan
† Emma Kelly y yiunan
Elio Kelly y yiunan
† Thomas y Nina Kelly-Feliciano y yiu

Tanta: Tina Croes-Kelly y yiunan

Swa y cuñanan:

Rosa Croes-Croes y yiunan
† Regina Otilia Croes
† Brigida "Didi" Croes
† Juliana "Chichi" Angela-Croes y yiu
† Tomas "Tomy" Croes
† Genara "Annie" Maduro-Croes y yiunan
Benito "Benny" y Balta Croes-Quintero
† Antonio "Silvio" y Silvia Croes-Boekhoudt y
yiunan
Beta y Nino Gibbs-Croes
Mario Croes
Anselmo "Chemito" y Gloria Croes-
Boekhoudt
Marcia y Pedro Flemming-Croes y yiunan
Ada Croes y yiu

Primo y primanan, sobrino y sobrinanan na
Aruba, Hulanda y Australia

Tur su ihanan

Famianan Kelly, Croes, Boekhoudt, Dreischor,
de Mey, Buckley, Feliciano, Angela, Maduro,
Quintero, Gibbs, Flemming, Vrolijk, Wester,
Oduber, Santa, Chaljub, Serje, de Luvio,
Romay Torres, D'Abdosio, Nijdam, Spreewers,
Lopez, Perez, Ou Donxia, Evans, Solognier

Nos amiga stima: Violeta Dijkhoff y yiunan

Su bon bisinanan:

Alicia, Olindo, Ika, Valerie, Bob, Joshua, Oya
y Ezekiel, Roosje y
Diego, Marisol, Elsie y Ronny, Linda, Reina,
Betto, Juan

Tur su ex-coleganan di Landslaboratorium.

Ta invita pa acto di entierro y condolencia
diamars dia 13 december 2022 di 9:00am
pa 11:00am na Aurora Funeral Home, sigi pa
Cremacion den seno familiar.

Na lugar di flor of krans por haci un donacion
na Koningin Wilhelmina Kankerfonds.

Despensa si den nos tristesa nos por a lubida
un famia of conocir.



Bo cariño y bo amor pa nos, hamas nos por
lubida. Bo amor pa nos tabata inmenso.
Semper cu un bunita smile riba bo cara pa
cu nos. Drumi dushi den braza di Señor,
Mami.

The Lord bless thee, and keep thee: The
Lord make his face shine upon thee, and
be gracious unto thee: The Lord lift up his
countenance upon thee, and give you
peace.

Numbers 6:24-26

Cu inmenso tristeza na nos curazon, pero
conforme cu Dios su boluntad nos ta
anuncia cu a fayece:

Virgilia Emiliana Croes-Roga

Mihor conoci como: Ily
*05-01-1941 - †08-12-2022

Na number di su:

Esposo: † Nazario "Chali" Croes

Yiunan: Narciso Croes y Marieta Arends
Robert Croes
† Mirna y John Dubero-Croes
Godfrido Croes
Lidia Croes
Edlin Croes

Nieto(a)nan: Derrick Dubero y esposa
Marilyn Maduro, Adeline Dubero y partner
Kervin Vrolijk, Bryant Croes y esposa Jurien
Ras, Mary-Lienn Croes, Dary-Lienn Croes y
partner Benjamin Ras, Liandra Dewberry,
Ederlaine Croes y partner Edgard Koolman

Bisanietonan: Devin, Deviné, Noëlanie

Rumannan: Sra. Vda. Anna Maduro y famia
Beto y Francisca Roga-Britten y famia
Sra. Vda. Marie Albertsz y famia
† Carmen Maria Vrolijk-Roga
Sita y Max Semeleer y famia
Maiky y Maria Roga-Ruiz y famia
Irena y Isidro Henriquez y famia
† Piet y sra. Vda. Ivonne Roga-Houweling y
famia na Hulanda
Ella y Franklin Pietersz na Curacao
Benny y Chela Roga-Dubero y famia

Swa y cuñanan:

Bertha y Ruben Wolff-Croes
Ailene y Franklin Ricky Tromp-Croes
Jacinto C. y Maxima Croes-Kelly

Demas famia: Roga, Vrolijk, Wester, Arends,
Dewberry, Dirksz, Wolff, Tromp, Kelly, Lopez,
Ras, Croeze, Suarez, Maduro, Britten, Albertsz,
Croes, Semeleer, Ruiz, Henriquez, Pietersz,
Dubero, Houweling, Irausquin, Koolman, Thiel.

Subrina y subrino nan, prima y primonan,
Amigo y amiganan di cas, bisijana y
conocirnan.

Ta invita pa acto di entierro cual lo tuma
lugar na misa Inmaculada Concepcion,
diamars 14 di december 2022 di 2'or pa
4'or di atardi, despues saliendo pa Santana
catolico na Sta Cruz.

Disculpa nos si den nos tristesa nos por a
lubida algun famia of conocir.



"Señor ta mi wardador, mi'n tin Falta di nada.
Den cunucu di yerba berde e ta pone mi
sosega. E ta hiba mi na awa trankil, Pa mi
bolbe haña forsa"
Salmo:23

Cu Profundo tristeza, pero conforme
cu boluntad di Dios. Nos ta participa
fayecimento di nos kerida Mama, Wela, Bisa-
wela, Ruman, Tanta y Prima Stima:

Irene Beatriz Delaney-Paesch

Miho conocí como:
Jena, pepe of Mama Irena
Salida di Solo: 31 Januari 1941
Bahada di Solo: 9 december 2022

Acto di entierro lo wordo anuncia despues.



Laga tur loke ta spera mi ta bunita.
Laga tur locual cu mi encontra na caminda
ta bunita. Laga tur locual cu mi laga atras
keda bunita y Laga esakinan termina den tur
buniteza.

Cado Wever.

Cu dolor na nos curason, nos ta participa
fayecimento di nos ser stima:

Adela P. Franken-Croes

Cariñosamente yama "Ika"
*04-11-1964 - †10-12-2022

Acto di entierro lo wordo anuncia despues



"Dios ta amor... y amor ta Dios, maske mi no
ta na e mundo aki, tur dia lo mi ta banda di
boso Curazon, mi por stens di loke Señor ta
hasi"
Salmo 33

Cu dolor na nos curason, nos ta participa
fayecimento di nos ser stima:

Sr. Ignatius A. Fontaine

Craiñosamente yama "Angus"
*31-07-1948 - †07-12-2022

Acto di entierro lo wordo anuncia despues



Lo E seka tur lágrima for di nan wowo, I morto
lo no eksisti mas: lo no tin nada di rou, nada di
yoramento, nada di dolo mas, pasobra tur kos
di antes a pasa bai.
Rev. 21:4

Cu dolor na nos curason, nos ta participa
fayecimento di nos ser stima:

Sr. Agustino T. Bernabela

Cariñosamente yama "Theo"
*25-03-1946 - †09-12-2022

Na nomber di su:

Casa: Rosalinda (Linda) Bernabela

Yiunan:

Mariska y Randell (Roy) Winterdaal
Lisandra Bernabela Y Lorenzo (Bibi) Loopstok
Jaime Bernabela y Kati Gobbi

Nieto(a) nan:

Sidmar Williams y Darriana Leito
Jaimyson Bernabela y Alexandra Boekhoudt
Landro Loopstok
Lyxienne Loopstok y Grego Regales
Royslenne Winterdaal
Hayleen Winterdaal
Jaimer Bernabela
Lindsay Loopstok
Maurice Antoine

Bisanieto(a):

Jahlxia Bernabela
Jahlxion Bernabela
Jaimelyne Nelson

Mama: † Venancia Bernabela

Rumanan:

† Juana Bernabela
Agustin (Doy) y Francisca Bernabela
Josephina (Editha) Bernabela

Subrino(a):

Egbert (Ebby) y Viviana Franken y Famia
Charles Franken y Famia
Marion Franken y Natto Maduro y Famia
Marian Franken (iha) y Kevin Maduro y Famia
Giovanni Bernabela y yiu
Vanessa Bernabela
Natasha Bernabela

Primo y prima nan, cuña y swa nan cu ta
mucho hopi pa menciona.
S.A.B.A. Afdeling Azalia, bisiña nan, Amigo
nan di futbol.

Famianan: Bernabela, Figaroa, Loopstok,
Winterdaal, Gobbi, Franken, Regales, Williams,
Boekhoudt, Leito, Maduro, Ras, Valentijn,
Theodora, Sule, Josepha, Marties, Gutierrez,
Engletina, Wilson, Tromp, Bernadita, Henriquez,
Sprok, Dongo, Antoine, Fingal, Davelaar,
Bernadina, Wanga y demas famia y amigo
nan cu ta mucho hopi pa menciona.

Ta invita pa asisti na e acto di entierro cual lo
tuma lugar **diahuebs 15 december 2022** pa
2or pa 4or di merdia na Royal Funeral Home.
Nos ta pidi disculpa si den nos tristesa nos a
lubida algun famia of conocir.

Despues di entierro no ta risibi bishita di
condolencia na cas.



Con profunda dolor y tristeza, pero conforme
con Dios su voluntad, la familia Urdaneta
Contreras y Perales anunciamos la partida de
nuestro amado

Adan Gabriel Urdaneta Contreras

*07-12-1980 - †09-12-2022

Invitamos a familiar, amigos y conocidos que
tuviero la dicha di conocerlo y compartir con
el, a su despedida que sera el miercoles
14 di diciembre del 2022 en la Aurora Funeral
Home de 9:00 a 11:00 am. Seguido por el
acto de cremacion en seno familiar




Acerca Dios cu cantica di alegria:
Canta contento pa Señor, henter mundo;
sirbi Señor cu alegria, acerc'E cu canticanan
di fiesta. Reconoce cu Señor ta Dios, t'E a
crea nos y nos ta di dJE; nos ta su pueblo,
carnenan, cu e ta cuida.
Salmo 100

Cu dolor na nos curason, pero agradecido
pa tur locual ela significa pa nos tur, nos ta
anuncia fayecimento di:

Ignocencia Maria Krosendijk

Mihor conoci como:
"Tanchi Ija", "Maria Chikito"
*22 Juni 1953 - † 11 December 2022

Acto di entierro lo wordo anuncia despues.



Laga tur loke ta spera mi ta bunita
Laga tur locual cu mi encontra
na caminda ta bunita.
Laga tur locual cu mi laga atras keda bunita y
Laga esakinan termina den tur buniteza.
Author: Cado Wever.

Eddy B. Rincon Bravo

*11-06-2003 - †30-11-2022

Famia ta participa cu dia 5 december 2022
nos a tuma despedida priva di nos ser stima y
despues ela wordo crema den seno familiar.

When the time is
right, if the Lord
will make it happen

Isaiah 60-22



Gradicimento

Di profundo di nos curason nos ta gradici tur hende cu di un of otro manera a mostra atencion, amor y cariño durante bida, fayecimento y despedida di nos querida esposo, tata, suegro, welo, ruman, omo y amigo:

Sr. Alberto Kock

Un gradicimento ta bay pa Dr. Horacio Oduber Hospital y tur verpleegkundenen, Dr. Petronilia, Dr. Weiser, dokter di cas M. Janssen, Shahaira Lopez pa su ayudo na cas, Hospice Atardi y hendenan di Hope & faith Transport.

Boso muestra di atencion ta di hopi aprecio y un gran sosten pa nos. Un danki na un y tur cu a manda carchi, krans, whatsapp, email y a hasi yamada nan telefonico.

Tambe na Aurora Funeral Home pa cu su bon servicio y atencion.

Alabes nos kier invita pa 1 Santo sacrificio di misa cual lo tuma lugar na Misa Birgen Fatima na Dakota diaranson 14 di december 2022 pa 6'or di atardi.

Bo(so) presencia lo ta altamente aprecia.



"Señor ta mi wardador,
mi'n tin falta di nada.
Den cunucu di yerba berde
e ta ponemi sosega.
E ta hibami na awa frankil,
Pa mi bolbe haña forsa". Salmo: 23.

Cu inmenso tristesa na nos curason nos ta anuncia fayecimento di:

Jose Rodrigues Teixeira

*21-02-1944 † 09-12-2022

Acto di Entiero lo wordo anuncia despues.



"Mi no a muri. Ta pesey mi no a bisa ayo.
Mi a djies habri mi halanan y bula bai keiro.
Boso a keda atras. No laga tristesa domina boso.
Keda uni cu otro mane semper ma siña boso pa mi alma por ta frankil, esey lo ta un alegria. Recorda mi cu hopi amor.

Salmo 91:

Bou di alanan di Dios mi ta sigur: Abo cu ta biba bou di amparo di ALTISIMO, ta hospeda den sombra di DIOS omnipotente, Bisa Señor: ' Mi refugio, mi forti, mi DIOS den kende mi ta pone mi konfiansa!

Cu honda pena pero conforme cu boluntad di Dios, Nos ta anuncia cu a bai sosega inesperadamente den brasa di Señor: Nos estimado Casa, Tata, Welo, Ruman, Omo, Padrino I Omo grandi

Sr. Roland Edwin Ras

Cariñosamente jama

Joy of Mo joy

*13/06/1957 †09-12-2022

Na number di su esposa stima:

Vda. Teresa (Ena) Ras-Geerman

Na number di su 3 prins nan:

Jahairo Angelo Ras (Hairo)

Omar Alexander Ras I Famia

Danny Gabriel I Roxanna Ras-Geerman I famia

Na number di su nieto(a) nan stima:

Darxion(Xion), Darxienny(Xienny),

Darvienny(Vienny) Ras

Nailine Melissa Henriquez(Naya)

Su Mayornan :

Roman I Gilberta (Beta) Ras- Rafini

Su Suegro I Suegra:

† Dominico (Boei) Geerman + Condesa (Keta) Rasmijn

Na number di su ruman nan:

Rufino Ras y famia

Gorge (Boy) Ras I Beatrice Becerra I famia

Robert(Leo) I Adrienne Ras-Hoek I famia

Haime (Randy) I Marcia Ras-Irausquin I famia

Su swa I cunian nan:

Lucia Geerman I famia

†Nemencio(Poli) I Vda Egidia Geerman-Dirksz

I famia

†Susanita(Annie) I †Jan Geerman-Geerman I

famia

Enriqueta(Rika) I Reki Panneflek-Geerman I

famia

Feliz (Buchi) Geerman I famia

Lucio (Kane) I Lena Geerman-Maduro I famia

Vda.Silvia (Vivian) I †Seferino (Uchi) Martijn-

Geerman

Su omo I tanta :

Pedrito(Dito) I Nilda Rafini-Nicolaas

Juanita(Nita) Rafini

Rosa Rafini

Su padrino stima:

Pedrito (Dito) Rafini

Su consuegro(a):

Eugenio i Imelda Geerman-Geerman

Stima mane jui:

Angenique Martinus-Hoek I famia , Ilenia Hoek I Famia, Natasha Sabina I Famia na Krosou, Jenny Gonzales I Famia

Su bon bisinia:

Vda. Eva Lue-Kock I Famia

Su sobrino,sobrina nan:

Tamara, Thailia, Gerald, Jeritsa, Maikel, Mikaela, Rufo, Rufino, Shakira, Rene, Richard, Rayvon, Junior, Eddy, Oscar, Eugen, Emerly, Ederlin, Lusi, Susi, Julie, Junjun, Erica, Cendrick, Camila, Brayen, Melanie, Feli, Pepi, Rayen, Magda, Luciena, Aby, Sergio, Giomar, Jhasmine

Stima mane un sobrino:

Patric I Imelda Geerman-Willems I fam

Su bon amigo nan:

Pablo I Famia

Kito I Famia

Rudy M I famia

Rudy A I famia

Marion I famia

Dino I famia

Armando I famia

Gino I famia

I demas amigo nan cu ta hopi pa menshona

Su ihanan,sobre sobrino I sobrina nan, su primo I prima nan acto primo I acto prima nan,famia nan i amistad nan na Aruba, Korsou, Bonairo, St Maarten, Hulanda su ex goleganan di Coastal, Coastal el Paso I Valero Refineri Marine department su amigo nan di KTK Tugs na Korsou

Su amigo I amistad nan di pesca na Coloney I Bucuti

I demas famia nan:

Ras,Geerman,Rafini, Rasmijn,Lopes, Henriquez,Boekhoudt, Panneflek,Dirksz, Hoek,Martijn, Steneboom, Kock, Maduro, Dorothal, Willems, Irausquin, Medina , Briezen Romero, Gonzales, Lue, Martinus, Adoptie, Mandone, Vrolijk, Frolijk, Becerra,De Cuba, Bislik, Molina, Ridderstap, Wernet, Solognier, Bernabela, Rodriguez, Kingsale, Paesch, Koolman, Peña, Croes, Briceño, Semeleer, Werleman, Heward, Angela, Pestana de Agrela, Flores, Pieterston, d'Aguiar, Wathey, Croes.

I demas famia nan i conocir nan.

Despensa nos si nos por a lubida un familiar of conocir na es momento nan aki.

Ta wordo invita pa acto di despedida I cremation cual lo tuma lugar **diahuebs 15 december** di 2or pa 4or na Pray Funeral Home na San Nicolaas

Oportunidad pa condolencia diaranson 14 december di 7or pa 9or di anochi na Pray Funeral Home na San Nicolaas

Email: cadilacdp3@hotmail.com

Whatsapp: +297 743 8559



AWEMainta

Scan nos QR code y bira abonado di AWEMainta

Completamente GRATIS

1: Usando bo camera di telefon,
scan nos QR code na banda.

2. Bay riba "Show Options",
"Open in browser".

3. Yena e formulario.

**Haya AWEMainta
tur dia den bo inbox!**



www.awemainta.com



www.facebook.com/AWEMainta



5880022



info@awemainta.com
noticia@awemainta.com
aviso@awemainta.com